

Antara hari raya dan pilihan raya



NUKILAN
MINDA

MUJIBU ABD MUIS

Seminggu menjelang detik perayaan, politik negara tetap bingit dengan kontroversi. Di sebalik tuntutan untuk meningkatkan ibadah dan memperbanyakkan amalan, riuh rendah politik negara masih rancak rentaknya serta konsisten kandungannya.

Pertukaran Ketua Menteri Melaka, amalan 'ganjaran politik' kepada kroni dan penyokong setia yang berleluasa serta isu rayuan pengampunan bekas Perdana Menteri, Datuk Seri Najib Tun Razak, antara perkara yang berlaku sepanjang Ramadan tahun ini.

Kebetulan tahun ini kita bakal bertemu dengan dua raya yang signifikan. Pertama, Hari Raya Aidilfitri dan kedua, Pilihan Raya Negeri (PRN) di enam negeri.

Walaupun kedua-dua raya itu berbeza dari segi maksud dan konteks tetapi sifat serta keraiannya sebagai sebuah perayaan adalah serupa.

Bagi kita rakyat kebanyakan, hari raya adalah hari kemenangan yang diraikan setelah berjaya menyempurna-

kan ibadah berpuasa selama sebulan. Ia disambut bagi menzahirkan kesyukuran kepada ALLAH dengan bertakbir, bertasbih dan bertahmid.

Hari raya selalunya diisi dengan amalan ziarah-menziarahi, saling bermaaf-maafan dan bersilatullahim, sesuai semangat Aidilfitri yang bermaksud kembali kepada fitrah (asal kejadian manusia yang suci dan bersih daripada dosa).

Sebaliknya pula dengan pilihan raya, ia adalah sambutan pesta demokrasi selepas sepenggal merancang dan merencana usaha bagi memperoleh kuasa.

Berbanding sambutan hari raya yang dibuat dengan penuh keinsafan dan sederhana, sambutan pilihan raya pula riuh rendah serta saling mendedahkan.

Namun, aspek raya jelas kelihatan pada kedua-duanya. Sama ada hari raya atau pilihan raya, perantau akan pulang ke kampung bagi merayakannya. Kesanggupan untuk balik ber-aidilfitri dan mengundi lebih tinggi hingga sanggup menempuh kepayahan.

Amalan ziarah-menziarahi dan jamuan rumah terbuka ada pada kedua-duanya. Pesta makanan berlangsung tanpa putusannya. Tiada siapa yang menolak undangan dan kunjungan sesiapa pun, hari raya mahupun pilihan raya.

Semuanya ceria berhimpun kerana sudah lama tidak bersua, mengikut perancangan program dan atur cara.



Pertukaran Ketua Menteri Melaka, amalan 'ganjaran politik' kepada kroni dan penyokong setia yang berleluasa serta isu rayuan pengampunan bekas Perdana Menteri, Datuk Seri Najib Tun Razak, antara perkara yang berlaku sepanjang Ramadan tahun ini."

Lebih seronok, pada waktu tersebut semua pihak automatik menjadi pemeru. Ketika hari raya mahupun pilihan raya, amalan sedekah, sumbangan dan pemberian bertukar tangan dengan ukiran senyuman.

Salam beres bak kewajipan dalam kedua-dua perayaan, cuma salam ketika pilihan raya punya makna. Ia perlu dibalas dengan memangkah nama si pemberi bila tiba mengundi berbanding salam hari raya yang hanya mengharap doa sejahtera daripada penerima buat yang memberi.

Begitulah suasana dua hari raya. Walaupun membawa maksud berbeza, pengisiannya tetap sama. Kedua-duanya membawa kenangan bermakna.

Namun, ia bergantung kepada sejauh mana individu itu menghayati konsep dan makna raya itu sendiri.

Jelas, ia dilihat dari sudut spiritual (hari raya) dan rasional (pilihan raya), namun kedua-duanya adalah ujian kepada jiwa yang merdeka. Sejahtera mana kita merayakannya? Kewajipan kita untuk bertanggungjawab dalam mengisi perayaan tersebut harus menjadi keutamaan. Kedua-dua raya tersebut menuntut kita kembali kepada fitrah.

Mungkin konsep fitrah bagi Hari Raya Aidilfitri bersifat abstrak dan umum tetapi fitrah pada pilihan raya sangat jelas. Kita sedang menunaikan tanggungjawab dan hak sebagai warganegara bagi memilih seorang wakil rakyat yang bekerja untuk kita.

Maka, sebagai pemilih yang merdeka, naluri kita mahukan wakil rakyat yang cekap, berkebolehan, bersih dan ada integriti. Kerana mereka inilah yang akan mencorakkan negara dan menentukan masa depan warga untuk tempoh lima tahun.

Kerana akhirnya jika kita salah memilih, kita terpaksa merana selama lima tahun melihat kesilapan pilihan kita sehingga kita didatangi pilihan raya bagi mengundi untuk membetulkannya semula.

** Mujibu Abd Muis ialah Pensyarah Kanan Sains Politik, Fakulti Sains Pentadbiran & Pengajian Polisi (FSPPP), Universiti Teknologi Mara (UiTM)*

Mendamaikan perang Yemen



KOPITIAM
KITA

CHRISTINE CHEAH

Setelah lapan tahun terjerumus dalam kancap perang saudara dan beribu orang Yemen terkorban, pemulihan hubungan Arab Saudi serta Iran yang diadakan di Beijing, China awal minggu ini menumbuhkan harapan baharu kepada krisis kemanusiaan yang paling teruk di dunia hari ini.

Perang Yemen kerap dilihat sebagai perang proksi - pemberontak Houthi di dukung Iran, sementara pasukan pemerintah disokong Arab Saudi. Bagi mengukuhkan inisiatif perdamaian, Arab Saudi telah melepaskan 13 tawanan perang Houthi dan Houthi telah melepaskan seorang tahanan Arab Saudi.

Satu lagi peristiwa penting yang berlaku di Timur Tengah minggu ini adalah perjumpaan delegasi Arab Saudi bersama militan Houthi di ibu kota Yemen, Sanaa untuk merundingkan kesepakatan

gencatan senjata secara kekal.

Dengan Oman bertindak sebagai pengantara bagi rundingan itu, laporan berita terkini adalah draf perjanjian damai telah sampai ke peringkat akhir.

Keinginan Arab Saudi untuk menjadi 'abang besar' yang cuba mendamaikan Timur Tengah menjadi lebih ketara apabila Menteri Luar Negeri Syria disambut rakan sejawatnya di Jeddah.

Perbincangan antara pegawai-pegawai diplomatik termasuk penyumbangan semula perkhidmatan konsulat dan penerbangan antara kedua-dua negara, kerjasama menangani pengedaran dadah serta usaha mengembalikan Syria kepada Liga Arab.

Hal paling tidak disangka ramai adalah pengumuman negara kuartet yang bakal menyertai rundingan konflik Syria di Moscow pada awal Mei kerana selain Iran, Arab Saudi dan Rusia, Turki yang boleh dianggap sebagai musuh Syria merupakan salah satu negara kuartet.

Apa yang ingin dicapai Arab Saudi di Yemen adalah untuk mengeluarkan pasukan asing di Yemen kerana perang yang mengambil masa lapan tahun itu telah menghabiskan banyak sumber kewangan. Selain itu, konflik politik tempatan Yemen dan pemulihan ekono-

mi negara perlu ditangani serta-merta.

Langkah-langkah yang mungkin Arab Saudi cadangkan adalah pembayaran gaji dan pampasan kepada penjawat awam Yemen yang terjejas sejak 2014, pembukaan semula lapangan terbang Sanaa yang akan membolehkan beribu pesakit menerima rawatan kritikal dan mengangkat sekatan di pelabuhan untuk meningkatkan ketersediaan barangan keperluan serta mengurangkan inflasi.

Namun, perang Yemen sebenarnya lebih kompleks dan perjanjian damai itu secara tidak langsung akan memberi pengiktirafan kepada Houthi. Pihak pemberontak tidak akan melepaskan peluang memerintah Yemen dengan sewenang-wenangnya.

Arab Saudi dan Iran ingin membuktikan bahawa usaha diplomatik mereka mampu mendatangkan keamanan di Timur Tengah. Amerika Syarikat (AS) yang mempunyai hubungan baik dengan Arab Saudi selama ini bertindak cepat untuk mengukuhkan ketidaksenangan dalam pemulihan hubungan tersebut.

Antara reaksi yang menunjukkan keresahan AS adalah lawatan mendadak Pengarah Central Intelligence Agency, William Burns ke Arab Saudi beberapa hari lalu.

Bagi Malaysia yang berada dalam Pertubuhan Kerjasama Islam (OIC) dan lebih-lebih lagi Organisasi Negara-negara Pengeksport Petroleum (OPEC), jajaran politik yang baharu di Timur Tengah mendatangkan cabaran berbeza.

Usaha Putera Mahkota Arab Saudi, Mohammed bin Salman untuk menguatkan dasar luar negaranya dengan mendekati Moscow dan China menunjukkan bahawa negara pengeluar minyak utama dunia itu ingin menjauhkan diri daripada kuasa-kuasa Barat.

Sekiranya jalinan Arab Saudi-Iran berjaya, konflik baharu akan muncul kerana kuasa Barat akan mencari negara proksi lain. Malaysia yang mempunyai hubungan diplomatik dengan Arab Saudi, Iran dan negara-negara Barat perlu menilai semula dasar-dasar luar negeri serta membuat keputusan sewajarnya bagi mengekalkan hubungan baik sedia ada.

Sama ada kebuluran dan keganasan di Yemen boleh diakhiri, Syria boleh kembali ke Liga Arab dan kedamaian yang menjadi impian ramai menjadi kenyataan di Timur Tengah. Kita nantikan.

** Christine Cheah ialah seorang pemuda yang ingin mengangkat martabat wanita dalam kalangan masyarakat*